

## ՓՈՒՆԸՄԲՈՒՆՄԱՆ ՀՈՒՇԱԳԻՐ

**Հայաստանի Հանրապետության քննչական կոմիտեի և «ԶԻԷՆՍԻ-ԱԼՖԱ» ՓԲ ընկերության միջև ինտերնետ հասանելիության ծառայությունների, անձանց տվյալների և հեռախոսազանգերի վերծանումների փաստաթղթաշրջանառությունն էլեկտրոնային տարբերակով կազմակերպելու վերաբերյալ**

Հայաստանի Հանրապետության քննչական կոմիտեն և «ԶԻԷՆՍԻ-ԱԼՖԱ» ՓԲ ընկերությունն (այսուհետ՝ Կողմեր), ելնելով ծանրաբեռնվածության նվազեցման, նյութական ռեսուրսների խնայողության ուղղությամբ ընդհանուր ձգտումից, նպատակ ունենալով հնարավորինս օպերատիվ և արդյունավետ կազմակերպել դատարանների որոշումներով անձանց բաժանորդային տվյալները, նրանց կողմից օգտագործված հեռախոսային կապի և էլեկտրոնային հաղորդակցության ծառայությունների (բաժանորդային տվյալների և ինտերնետային հասանելիության տվյալների) վերծանումները (այսուհետ՝ Վերծանումներ) էլեկտրոնային եղանակով Հայաստանի Հանրապետության քննչական կոմիտեին տրամադրելու գործընթացը և դրանով իսկ՝ ապահովել նախաքննությունը ողջամիտ ժամկետում ավարտելու սահմանադրական պահանջը,

- անհրաժեշտ են համարում Վերծանումների ստացման գործընթացն արդյունավետ կազմակերպելուն ուղղված համատեղ քայլերի մշակումը և իրագործումը,
- գիտակցում են, որ քննարկվող նպատակներին հասնելը պետք է կրի համակարգված բնույթ՝ տեխնիկական նորարարությունների ներմուծմամբ:

**Երկուստեք աշխատակիցների ծանրաբեռնվածության նվազեցման, նյութական ռեսուրսների խնայողության նպատակով կողմերը մտադրված են՝**

- իրականացնել համատեղ միջոցառումներ դատարանների որոշումների և Վերծանումների օպերատիվ փոխանցման ուղղությամբ,
- զարգացնել տեխնիկական հնարավորությունների ներդրման հարցում փոխգործակցությունը:

**Այդ նպատակով Հայաստանի Հանրապետության քննչական կոմիտեն.**

- ապահովում է «Էկենգ» ՓԲԸ-ի կողմից ներդրված և սպասարկվող էլեկտրոնային ստորագրությամբ հաստատված ուղեկցական գրություններով Վերծանումների վերաբերյալ դատարանների որոշումները կապի օպերատորին փոխանցելը,

- գործընթացի շրջանակում առաջացած խնդիրների լուծման հարցում ցուցաբերում է անհրաժեշտ օժանդակություն:

**«ՋԻԷՆՍԻ-ԱԼՖԱ» ՓԲԸ-ն ապահովում է.**

- սեղմ ժամկետում Վերծանումների Էլեկտրոնային տարբերակով փոխանցումը Հայաստանի Հանրապետության քննչական կոմիտեի դեպարտամենտի 1-ին բաժին,
- «Հրատապ» դրոշմակնիքը կրող ուղեկցական գրություններով ստացված դատարանների որոշումների առաջնահերթ կատարումը:

**Կողմերը.**


- դատարանների որոշումների և Վերծանումների փոխանցման գործընթացն օպերատիվ և արդյունավետ կազմակերպելու նպատակով մշակում են առաջարկություններ, անհրաժեշտ քայլեր ձեռնարկում դրանց իրագործման համար,
- կազմակերպում են վերոնշյալ գործընթացում ի հայտ եկած խնդիրների համատեղ քննարկում:

Ստորագրված է Երևան քաղաքում 2018թ. մարտի 29-ին, երկու բնօրինակով, ընդ որում՝ երկու տեքստերն էլ հավասարազոր են:

**Հայաստանի Հանրապետության  
քննչական կոմիտեի նախագահ՝**

  
**Ա. Հովսեփյան**

**«ՋԻԷՆՍԻ-ԱԼՖԱ» ՓԲԸ  
գլխավոր տնօրեն՝**

  
**Տ. Ֆարմազյան**